

Toja

I.

Amors e iois e liocs e tems
mi fan tornar lo sen e derc
d?aqel noi c?avia l?autr?an
can cassava·l lebr? ab lo bou;
era·m vai mieltz d?amor e pieis,
car ben am, d?aiso·m clam astrucs,
ma non amatz ioi gau en cers,
s?Amors no vens son dur cor e·l mieus prec.

II.

Cel que totz bes pert a ensems
mestiers l?es que ric segnor cerc
per restaurar la perd? e·l dan,
qe·l paubres no·il valri?un uou;
per so m?ai ieu causit e lieis,
don non aic lo cor ni·ls uoills clucs;
e pliu·t, Amors, si la·m conquers,
trevas totz temps ab totas, fors dels decs.

III.

Pauc pot hom valer de ioi sems:
per me·l sai que l?ai agut berc,
car per un sobrefais d?afan
don la dolor del cor no·s mou;
e s?ab ioi l?ira no·m for eis
tost m?auran miei paren faducs;
pero tals a mon cor convers
q?en liei amar volgra murir senecs.

IV.

Non sai un tan si? e Dieu frems,
ermita ni monge ni clerc,
cum ieu sui e leis de cui can,
et er proat ans de l?annou.
Liges soi sieus mieltz que demieis:
si·m for? ieu si fos reis o ducs;
tant es e lieis mos cors esmers
que s?autra?n voil ni?n deing, donc si?eu secs!

V.

D?aiso c?ai tant duptat e crems
creis ades e meillur e·m derc,

q?el reproers c?auzi antan
me dis que tant trona tro plou;
e s?ieu mi pec cinc ans o sieis,
ben leu, can sera blancs mos sucs,
gausirai so per q?er sui sers,
c?aman preian s?afrança cors ufecs.

VI.

De luencs suspirs e de grieus gems
mi pot trair cella cui m?aerc
c?ades sol per un bel semblan
n?ai mogut mon chantar tot nou.
Contra mon vauc e no m?encreis,
car gent mi fai pensar mos cucs.
Cor, vai sus: ben sai, si't suffers,
sec tant q?en lieis, c?ai encubrit, no't peccs.

VII.

Ans er plus vils aurs non es fers
c?Arnautz desam lieis ont es fermanz neccs.

- letto 1119 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/toja>